

"2017an 100 urte betetzerako Haundi hirugarren mailan egotea nahi genuke"

► JESUS MARIA UNCILLA CD ELGOIBARKO PRESIDENTEA

Bukatu da futbol denboraldia, eta balorazioa egiteko unea iritsi da. Jesus Mari Uncilla CD Elgoibarko presidentea esandakoaren arabera, denboraldi positiboa izan da oro har, baina Haundi mailaz ez igotzearen arantza geratu zaio. 2017an ehun urte beteko ditu CD Elgoibarrek, eta ordurako Haundi hirugarren mailan egotea nahi dute klubeko arduradunek.

- AINHOA ANDONEGI -

♦ Bukatu da futbol denboraldia. Nolako balorazioa egin duzue?

Denboraldia ona izan da, baina Haundik ez du lortu mailaz igotzea, eta arantza hori geratu zaigu. Dena dela, seigarren egin du, eta postu ona da. Talde berria geneukan, jubeniletatik igotako jokalariek ziren gehienak, eta lan ona egin dute. Eguberriak arte igotzeko postuetan ibili ginen, eta hamaika jardunaldiren faltan lortu genuen mailari eustea. Beraz, kirol alorrari dagokionean denboraldi ona izan da. Futbol eskolan 70 lagunetik gora ditugu astero entrenatzen eta beste herrietako eskoletako taldeen kontra jokatzen, beraz, oinarria sendo daukagu. Alebinetan bi talde ditugu, infantil txiki mailako taldea mailaz igo da; lehen mailako infantilak Gipuzkoako txapeldunorde izan dira, kadeteek ere denboraldi ona egin dute, bai ligan eta kopan, jubenilek ere bai... oro har, pozik gaude maila guztietan lortutako emaitzekin.

♦ Eta balorazio ekonomikoa?

Kasu honetan arazo gehiago izaten ditugu, normalean gastuak sarrerak baino handiagoak izaten direlako. Publizitatean jaitziera handia igarri dugu krisiaren eraginez, eta diru-sarrera berriak aurkitzea zaila egiten zaigu.



♦ Denboraldi amaierarako paella jana antolatu zenuten. Nola irten zen jaia?

Oso ondo, aurreikuspen guztiak gain ditugu genituen. Giro oso onean joan zen eguna, eta Maalan egitea ideia oso ona izan zen. Futbola herrira gerturatzeko hainbat ekimen egin ditugu, futbola ez dadin Mintxetan ezkutatuta egon.

♦ Taldeak osatzeko zailtasunak izaten dituzue?

Taldeak osatzeko jendea izaten dugu normalean, bereziki, mutiletan. Neska gehienak, baina, eskubaloira joaten dira, eta ez dugu lortzen nesken taldea osatzeko. Futbol eskolan laupabost neska ditugu, baina adin betetik aurrera ezin dute mutilekin jokatu, eta futboleko segitzeko aukerarik gabe geratzen dira. Udaleko Berdintasun Sailarekin ari gara lanean futbola nesken artean zabaltzeko. Gustatuko litzaziguke alebinetatik sortzea nesken taldea. Entrenatzaileak topatzeko ere zailtasunak izaten ditugu, maila batetik aurrera tituludun entrenatzailek behar izaten direlako.

♦ Haundirako kanpoko jokalaria asko ekartzea leporatu izan zaio CD Elgoibarrri. Nola dago taldea gaur egun?

Elgoibarko bost jokalaria ditugu, eta nahiko genuke horiek segitzea. Regionala mailaz igotzea ere ondo legoke, Haundirako harrobia sendotzeko. Orain bi kategoriako aldea dute Haundik eta erregionalak, eta egokiena bata bestearen azpian egotea litzateke.

♦ Aurrera begira, zein dira helburuak?

Nesken futbola sustatzea nahi dugu, eta aurtien ere egin ditugu horretarako hainbat saiakera. Emakumeen Egunaren harira emakumezkoen arteko partidak antolatu genituen, baina ez zuen arrakasta handirik izan. Horrez gain, Haundi mailaz igotzea izango da gure helburu nagusia. 2017an ehun urte beteko ditu klubak, eta ordurako Haundi hirugarren mailan egotea nahiko genuke. Gipuzkoako klubik zaharrenetarikoa da gurea; pentsa, Gipuzkoako Federazioak berak ere urtebete beranduago egingo ditu ehun urte, eta Eibarrek ere 75 bat urte ditu.